

## פרק קמח

(א) הַלְלוּיָהּ הַלְלוּ אֶת יְהוָה מִן הַשָּׁמַיִם הַלְלוּהוּ בַמְרוֹמִים: (ב)  
הַלְלוּהוּ כָּל מַלְאָכָיו הַלְלוּהוּ כָּל צְבָאוֹ: (ג) הַלְלוּהוּ שֶׁמֶשׁ וַיָּרַח  
הַלְלוּהוּ כָּל כּוֹכְבֵי אוֹר: (ד) הַלְלוּהוּ שְׁמֵי הַשָּׁמַיִם וְהַיָּמִים אֲשֶׁר  
מַעַל הַשָּׁמַיִם: (ה) יְהַלְלוּ אֶת שֵׁם יְהוָה כִּי הוּא צִוָּה וְנִבְרָאוּ: (ו)  
וַיַּעֲמִידֵם לְעֵד לְעוֹלָם חֵק נָתַן וְלֹא יַעֲבוֹר: (ז) הַלְלוּ אֶת יְהוָה מִן  
הָאָרֶץ תְּנִינִים וְכָל תְּהוֹמוֹת: (ח) אֵשׁ וּבָרָד שֶׁלֵּג וְקִיטוֹר רוּחַ  
סַעֲרָה עֲשֵׂה דְבָרוֹ: (ט) הַהָרִים וְכָל גְּבְעוֹת עֵץ פְּרִי וְכָל אֲרָזִים:  
(י) הַחַיָּה וְכָל בְּהֵמָה רִמָּשׁ וְצִפּוֹר כָּנָף: (יא) מַלְכֵי אֲרֶץ וְכָל  
לְאֻמִּים שָׂרִים וְכָל שֹׁפְטֵי אֲרֶץ: (יב) בַּחֹרִים וְגַם בְּתוֹלוֹת זִקְנִים  
עִם נְעָרִים: (יג) יְהַלְלוּ אֶת שֵׁם יְהוָה כִּי נִשְׁגָּב שְׁמוֹ לְבַדּוֹ הוֹדוּ  
עַל אֲרֶץ וְשָׁמַיִם: (יד) וַיִּרְם קֶרֶן לְעַמּוֹ תְהַלֵּה לְכָל חֲסִידָיו לְבְנֵי  
יִשְׂרָאֵל עִם קִרְבוֹ הַלְלוּ יְהוָה: